



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

45. Kalenderwoche – ab 8. November 2009

Manschma schdreigd de Fandasio

Gomisch is ja werglisch, was eim so in dor Orinnorung bleim dud... so aus dor Vorgangenheid! Aus dor Zugunfd is das ja nisch meeschlich - jednfalls nisch bei unsoreim als normal Schdärblischor!

Zum Beischbiel is mir noch wie heide aus dor Vorgangenheid in Orinnorung, wie mir am neidn Novämbor 1989 in dor "Ärzgebirgs-Schdube" im "Gemnidzor Hof" gesessn hamm... megsiganischor Ahmd mid megsiganisches Essn un megsiganischor Musig un so... das konndn mir uns dazumals, ohne mid dor Wimbor zu zuggn, leisdn! - jednfalls ham mir da also mid Freinde gesessn, ham megsiganisches Essn gegessn un Degihla geschnäbsld... un dann had dähr Disgjojgei gesachd, dassor ehm ibors Radjo geheerd had, dass in Bärln de Mauor offgegang sein däde. Alle kenn naus, die wolln.

Isch weeiß noch wie heide, dass isch das nisch gloom konnde.

Un isch begreife eischendlich bis heide nisch, dass de Russn da zugeguggd ham. Vierzisch Jahre lang ham die uns neingemährd in unsorn Sozialismus. Vierzisch Jahre lang ham die uns de öborschdn Bardeibonzn vor de Nase gesedzd... vierzisch Jahre ham die beschdimmd, wies loofn dud... un bledzlich? Wie eene heeße Gardoffl ham die uns falln lassn. Also, das, was nu nach vierzisch Jahre von eenor sozialisdischn DDR noch ibrisch gewähsn is!

Och meine Gudste un unsre Freinde ham dagesessen un ham iborleeschd, ob se sisich nu frein solldn odor mähr nisch. De Mauor umgeschubbd!

Isch weeiß noch, wie isch dazumals dagesessn hab, un hab vorsuchd mir auszudenkn, wie denne nu

de Zugunfd wern dun kennde. Un isch weeß noch, dass isch mir de Zugunfd eenfach nisch vorschdeln konnde. Da hädde isch gerne ma so eene Zeidreise in de Zugunfd gemachd. Un dann häddsch misch ehm ooch an de Zugunfd erinnorn kenn. Un nisch bloß an de Vorgangenheit. Abor es ging nisch. Isch saß bleede da un hab gedachd, dass isch mir das nisch vorschdeln konnde, wie das nu wern soll. Dass alle volgseischnen Bedriebe vorschärbeld wern... dass de Dreuhand komm dud un de Wirtschafd abwiggl'n dud... dass dor gesamde Eenzlhandl in de Hände von de Subormärgde falln dud... e Absadzmargd vom Feinsdn!... Arbeitslose... Reisefreiheit... bliehende Landschaftn... nee, das konnde isch mir nisch vorschdeln. Da had de Fandasio geschdreigd! Meine Gudste had soford angefang, driebor nachzudenkn, ob mir nu nisch gleisch näschsdes Jahr ma direggd nach Megsigo fahrn kenndn. Nisch bloß so Hilfsmegsigo in dor "Ärzgebirgs-Schdube" - mid "Fjesda, fjesda Megsigana..." von Regs Gildo.

Unsre Freinde wolldn allordings lieber in de USA. In dähn wildn Wesdn. Un San Franzisgo! Das warn so Hibbifenns gewähsn unsre Freinde... wo se jung warn.

Abor weidor had ooch bei dähnen de Fandasio nisch gereischd. Grade ma bis San Franzisgo! Bei meinor Gudstn bis zum Bobogaddebehdl un zum Diddigaggasee!

Eduard Sachsenmeyer